

## **Iemisi peba owera ie Iesu urubia aboto**

<sup>1</sup> Mo Iemisi ie, nedi peba titi owera ro nio aboto mo ro nisioidiro. Godi edi woko ro mo ro wisa tato se nemesioidirotiti, ina Abera Naramu Iesu Keriso woko dubu, mo nou e.

Nio 12 gu Godi urubia ie duriomoro gabogabo na-gororoburutai-rimo karaho arua duriomoro ato na-goititi-rimo, nedi peba titi ro nio aboto nisioidiro. Ibose mo kamade owera ie nio aboto.

*Nio kimibiria kiwaibirio ato, nio pupuwo nato  
kiwai ie*

<sup>2</sup> Mo kimibiria niramio, koko kiwaibirio tanaro nio aboto beda tau ato kou ra, nio modobo ie kamade ro aise kiwati.

<sup>3</sup> Mabu nio umoro ie nedi koko tau sirio ro nio kimibiria kiwaibirio ie, ina iedi awawo kiwaibirio tanaro sirio ro nio neio ro pupuwo imowaititi rie koko se kirimowotoi aboto.

<sup>4</sup> Nio ro modobo pua nedi koko se kirimowotoi tanaro ro kimesere. Ina noudo ie nio Godi sosoro gabo ato kiroromowado, ina nio ro erere tanaro kisioidiro maumo ato imese momuo se ata ubauba tato ie, ubauba korowomidiro tanaro nio abato iamo-ri pua.

<sup>5</sup> Kaupoti nio ata abato auna muro kowamo tato, nou sapuwo to modobo ie Godi kararatoro. Ina muro Godi ro ama-aiwai-ri nou aboto. Mabu nu nirimagare ie urubia aboto, ina nou ro kemadowerai tato moro ato nou ro auna kamade mutu iaiwotiti-die urubia aboto.

<sup>6</sup> Kaupoti nedi dubu ro nou abato kimibiria aise kiamo modobo ie, modobo pua netewa teibo kimaragoidiro teibo mutu kararatoro. Mabu nio etio ra kimaragoidiro teibo mutu na-iraratoro-dumo, nio ota petata sosoro ie koriro obo ro na-iwawodorowado, giripai to kiwidiyai ie, ina komiodoi obo ro iato kiwororuwo ie.

<sup>7-8</sup> Idaibo sosoro egea mere se kimibiria urubia neio ro modobo pua tanaro kaupoti kimaragoidiro ato kosioidiro. Ina idaibo urubia ro kararatoro ato, Abera Naramu aboudo ata wisa ata omidai-ri pua, neio kimaragoidiro teibo urubia ie.

<sup>9</sup> Ina kimibiria urubia etio ra sopu ia to na-orowomidiro modobo ie neio kamade ro kiwati, mabu neio awawo masiro mutu e.

<sup>10</sup> Abora etio ra suana sirio urubia to na-wararasoro-dumo nedi duriomoro ro nato, neio modobo ie kamade ro kiwati neio Godi ro sopu to kiwororuwo ato. Mabu iedi suana sirio urubia ro tumu kakamu sosoro ie sugamoso daimo ato na-irowotoi,

<sup>11</sup> saiki kemewea ato puara kakamu mutu aise kitemeiriai ie ina edi kakamu ro aise karaburai ie. Ina idaibo sosoro atu tanaro ibo amadimo-ororosoidiro-ri. Etio ra suana sirio mutu na-orowomidiro neio edi suana sirio ro neio aboto se na-imaragoidiro-dumo, neio namabu kimade tanaro kisioidiro moro ato keremiro nato amadimi-iasepere-ri.

*Koko kiwaibirio tanaro ubauba kisioidiro aboto Godi aboudo oroho pua*

<sup>12</sup> Koko kiwaibirio tanaro na-woroho-dioumo urubia aboto, ina neio koko se na-orowotoi, neio

modobo ato ama-irowomidiro-ri. Nedi koko kiwaibirio tanaro ro namadimo-oroporeai-ri, Godi ro wisa womu tato keremiro ama-iaiwo-ri neio aboto. Etio ra Godi nirimagare na-emati-dumo, neio wisa Godi ro kebase ta-gimedeia.

<sup>13</sup> Kaupoti urubia koko kiwaibirio tanaro ro na-iwaibirio-dumo, ubauba tanaro kisioidiro aboto, neio ro ibo utura mamu, 'Nedi koko kiwaibirio tanaro ro ubauba tanaro kisioidiro aboto, Godi aboudo ou-diemo.' E e. Mabu ubauba ro Godi modobo pua kowaibia, ibose Godi ro ata dubu ata owaibia-ri pua ubauba kosioidiro aboto.

<sup>14</sup> Kaupoti urubia kiwaibirio ato ubauba tanaro kisioidiro aboto, neio goino ro simara ubauba ubi mabu ato kiroboi ie.

<sup>15</sup> Ina iedi ubauba ubi ro, idaibo sosoro ie orobo niro mutu na-oroho. Ina iedi orobo ro bamuai kainai koroto ato, nedi bamuai ro nou masiro Ubauba Tanaro. Ina nedi bamuai ro nou auna koi ato, nou ro ina simara bamuai koroto ie. Nedi orio bamuai ro nou masiro Pamo.

<sup>16</sup> Mo niramio nirimagare babio, nedi owera ro nou sapuwo to nio modobo pua arua urubia ro kisaubuti.

<sup>17</sup> Imese sirio meamea tanaro, imese sirio meamea kiaiwo namabu mutu, ohu rido iroruwoiro-die, Abera Godi aboudo ou-diomo. Nedi meamea kiaiwo namabu ro etu ro gisioidiro saiki, sagana, kiboni nou aboudo ou-diomo. Nu beda erewesegeruti-ri pua beda sosoro ra saiki, sogomi, kiboni, duwo neibi na-irimahudirititi-bimo.

<sup>18</sup> Nimo Godi ro orio keremiro ta-nimia-ro nou

edi morobise oweru ro neito. Nou ro simara ubi  
ato ibo gisioidiro nimo nou ia tarena urubia to  
iapoi ri.

*Godi oweru na-irorowai-dumo ina durupi to aise  
disioidiro-mo*

<sup>19</sup> Mo niramio nirimagare babio, umoro  
ba-doi-mo ibo urubia dubu ro oweru  
na-warodie modobo pua oweru karo aboto hio  
to karadabu, nio ro sirio tau modobo ie gare se  
kemedea. Ibose nio modobo pua serawo hio to  
koi.

<sup>20</sup> Mabu urubia serawo ro na-iworohuti-dumo  
neio modobo pua tuputupu gabo ato koroho,  
Godi ubi beda sosoro to iamotiti-die.

<sup>21</sup> Ina noudo ie nio abato beda ubauba tanaro  
ra nio ro kisioidiro ato nio mareamarea neito  
korowaititi ie, ibose nio nedi duriomoro ro nato  
na-orowomidiro sirio ubauba tanaro iamotiti,  
nio ro modobo ie edi ubauba sirio ro kiwagare,  
Godi edi mea oweru ro nio ro mea se  
domidai-mo. Iedi oweru ro nio giropu ato nou ro  
kebase ta-gibouti, ina nou ro modobo ie nio  
ubauba aboudo kiapopo.

<sup>22</sup> Godi edi oweru ro beda sosoro aro nio ro  
durupi to aise kisioidiro. Ina nio ro beda tau ato  
irorowai-dumo oweru, ibose durupi to isioidiro  
tato, nio idaibo nakara se arasaubuti-dumo.

<sup>23-24</sup> Ina etio ra Godi edi oweru ro nou aboto  
na-irowidiro-dumo ina durupi to kisioidiro tato,  
edi urubia ro idaibo sosoro ie garasi ato sosoro  
na-ereauri-dumo iato neio sosoro kimaragoidiro  
rido samo to aise kararaseperai ie.

<sup>25</sup> Arua urubia ro Godi edi mea ia kitamudiro  
oweru ro, sirio tau neio ro aise

irimoputiti-dumo. Ina nedi urubia ro ata ubauba tanaro ata ro imatahiti pua. Neio ro woki imati-ri pua beda oweri irowidiro-dumo ina durupi to aise kisioidiro ie. Nedi tanaro ro etio ro isioidiro-dumo, neio ro sirio tanaro kisioidiro maumo ato modobo ato ama-irowomidiro-ri.

*Morobise kemowabu gabo nou e*

<sup>26</sup> Urubia ro ibo na-imaragoidiro-dumo neio ro Godi edi ubi gabo ro tobodoro-dumo, kaupoti neio oweri karo kororodiobuti tato, neio nakara se arasaubuti-dumo. Neio ro edi gabo ro na-obodoro-dumo ata meana ata owamo pua.

<sup>27</sup> Ina ata sosoro gabo towamo nou imese mareamarea tato ia ie. Nedi gabo ro nimo Abera Godi ro ubi to nou omadetiti ibo, nimo ro nito merebusere garamio mamio mutu mibo tau na-iauri-dumo neio kiwarebai. Ibose nimo sopu duriomoro edi mareamarea tanaro ro neio aboudo imese na to karagarewado ie.

## 2

*Modobo ie urubia atu sosoro tanaro to kiworohuti*

<sup>1</sup> Mo niramio, Abera Naramu Iesu nou imese gebari pere ia ie, nou sapuwo to nio kimibiria tiworohuti-dumo. Ina noudo ie nio ro modobo ie urubia atu sosoro tanaro to kiworohuti.

<sup>2-3</sup> Etu umoro ra ata kimibiria dubu ata nio soirio maumo to kodoro ato, nu meamea namabu to keremeduti ie, gorodi tu reini kiaremo ie tu ato, ina nou nio ro kowea ato etu umoro ra nou nio ro ibo kemowapotai ie, 'Oro sea ta-nemedea-mo, dou-ro neito, nato ba-domi-ro.'

Ina mareamarea dubu kerekere namabu mutu kodoro ato, nio ro etu umoro ra nou ibo kemowapotai ie, 'Oro goto araradi ato dotoi.' O 'Mo sairo mabu ato nato ba-domi.'

<sup>4</sup> Nio ro idaibo sosoro owera karo ato io ubauba ie, nio idaibo nakara se korowapotai ie ibo, nio arua urubia mutu kidabuti pua. Arua urubia nio ubi urubia ie, ina arua urubia nio ro ubi tato to iasoro-dumo, nio maumo ato idaibo ubauba kimaragoidiro neio ro iamotiti.

<sup>5</sup> Mo niramio, nirimagare babio, owera neito ma-dirowidiro-rimo. Arua urubia sopo duriomoro urubia ro namabu tato urubia to iasoro-dumo. Kaupoti nedi namabu tato urubia ro Godi ro ta-girapoi-ro auna kimibiria iworohuti ri. Neio ibose Godi ro ta-girapoi-ro nou edi kiwaboi tanaro maumo ro ito odouti ri. Godi ro hodo keba se ta-gasaubiai-ro nedi tanaro ro nou ro osioidiro ri, etio ra nou nirimagare na-ematiti-dumo neio aboto.

<sup>6</sup> Kaupoti ubauba tanaro nio ro isioidiro-dumo neio aboto. Nio umoro iamo pua ra ibo nio namabu sirio urubia ro itarumowado-dumo? Ibose nio umoro iamo pua ra ibo nio neio ro koto aboto imudo-dumo?

<sup>7</sup> Ibose nedi namabu sirio urubia ro Iesu tarena masiro ubauba neio ro a-owaititi-dumo ra? Ina nio nou urubia ie.

<sup>8</sup> Nimo eputa dubu Godi nou edi sabi ro Tarena Buka ato owamo ibo, *Oro ro modobo ie arua urubia nirimagare kimati, oro beda sosoro eremati nirimagare nakara se.*

Ibose nio ro nedi sabi ro mea se na-obodoro-dumo, io idaibo ie nio ro mea gabo obodoro-dumo.

<sup>9</sup> Kaupoti nio urubia aboto se atu mino to iworohuti tato, io nio ubauba tanaro isioidiro-dumo ina nio Godi edi sabi ro nou ro kiwawea ie ibo nio sabi kisebo urubia ie.

<sup>10</sup> Etu ra Godi edi sabi sirio ro na-ibodoro, ina nou ro kaupoti ia sabi na-esebea, io idaibo sosoro ie imese sirio sabi ta-isebea.

<sup>11</sup> Mabú Godi ro kebase owera ibo ta-gisioidiro, *Arua urubia mamio iwadaudio mamó*. Ina ata owera Godi ro ibose ta-gisioidiro, *Urubia iopiauti mamó*. Ina oro ro arua urubia mamio kiwadaudio pua sekere, kaupoti urubia dubu na-wopia oro ro ibo pua kaupoti sabi kesebea, oro sabi kisebo dubu to imese kararapoi ie.

<sup>12</sup> Nio ro beda owera karo ra ibose beda tanaro kisioidiro ra, nedi tau ro nato ba-dimaragoidiro-mo ibo nimo Godi ro saiki ata anamadi-imeiyoti-ri, ina hodo nou ro imopurutititi.

<sup>13</sup> Mabú arua urubia mibo maumo ato na-orowomidiro etio ra neio nirimagare imati tato, saiki ata neio aboto Godi ro ubauba wisa nirimagare tato se ama-iaiwo-ri. Kaupoti beda urubia ra arua urubia nirimagare na-imati-dumo, saiki ata nedi urubia ro neio aboto Godi ro wisa nirimagare mutu ibose to ama-iaiwo-ri.

*Kimibiria tanaro durupi to kisioidiro tato, iedi kimibiria ro pamo ie*

<sup>14</sup> Mo niramio, ata dubu ata ro karo ato ibo, 'Mo kimibiria dubu e,' ina nou ro durupi to meamea tanaro kisioidiro tato, modobo ra

idaibo? Idaibo dubu kimibiria kawakawa ro se kapopo ra ubauba aboudo?

<sup>15</sup> Ina idaibo etu umoro ra oro ata kimibiria neama o medera ohu sedo tato ie aratimai na, o nou abato ata nakomu ata owamo pua adimo ouho na.

<sup>16</sup> Oro ro nu ibo kemowapotai ato, 'Natonato ie, obotama ra ohona ra oro abato aise ba-miamo.' Kaupoti oro ro idaibo owera na-utura nou aboto, ata mea tanaro ata osioidiro tato, nu idaibo oro ro kowarebai ra?

<sup>17</sup> Ina idaibo atu sosoro tanaro ie kimibiria durupi to kisioidiro mutu neitiro atu se karadabuai tato, iedi kimibiria ro eremiro pua, pamo ie.

<sup>18</sup> Kaupoti mo ata dubu ata ro ibo namadi-emowapotai-ri, 'Oro kimibiria mutu ra? Mo wisana meamea tanaro ti-nisioidiro titi.'

Ina nou mo ro ibo nama-emowameai-ri, oro ro meamea tanaro durupi to kisioidiro tato, mo oro ro beda sosoro namadi-emowapotai-ri ibo oro kimibiria mutu e? Ina mo edi kimibiria ro oro aboto ibo anama-owapotai-ri beda meamea tanaro nisioidiro durupi to, io mo kimibiria ibo niwawuti.

<sup>19</sup> Oro ibo timibiria Godi kaupoti nou se ie. Io modobo sekere, ata nakomu tato ie. Ina ubauba urio neio ibose timibiria-dumo ibo Godi kaupoti nou se ie (ina neio abora tere ri imuguguti-dumo)!

<sup>20</sup> Oro imese ararai dubu e! Oro umoro beda tau ato ama-oi-ri ibo durupi to kisioidiro tato meamea tuputupu tanaro, iedi kimibiria ro ioudo ata nakomu ata ororomai-ri pua?



<sup>21</sup> Oro ro ma-diauri, nimo nasa Aberaham, nou ro durupi to meamea tuputupu tanaro ta-isioidirotiti. Godi ower a gabo modobo nu simara mere patapata ato aise gotomai ematowo ri.

<sup>22-23</sup> Ina nou Godi ro mea tuputupu dubu to nou ri gapoi.

Oro ro nedi tanaro teibo ro mea se ma-diwiia-ma, kimibiria ina durupi to meamea tuputupu tanaro kisioidiro, neitiro ibo kororobidiro ie, woko atu se ibo isioidirotiti-do. Ina ma-diwiia-ma, Aberaham edi kimibiria ro kokoho idaibo mino to gemowaititi.

Ina Tarena Buka ato edi ower a ro na-gisioidiro-rimo aise gororosoidiro-rimo. *Nou Godi ro mea tuputupu dubu to gapoi-ro, mabu Godi edi ower a ro Aberaham ro aise gimibiria.* Ibose nu Godi ro namutuna to aise gapoi.

<sup>24</sup> Ina noudo ie nio ro ma-diauri-mo, urubia dubu Godi ro mea tuputupu dubu to nato kapoi ie, nou ro durupi to meamea tuputupu tanaro aise na-isioidiro. Kimibiria nakara se modobo pua.

<sup>25</sup> Ina ibose atu sosoro mea tanaro Reihebi ro ibo gisioidiro, nou era gabo orobo sekere, kaupoti nu Godi ro tuputupu orobo to nou ri gapoi mabu nou ro meamea tanaro gisioidiro. Isiraere urubia puki dubu teibo ito na-gorowateai-rido nou edi duriomoro gebari ro neio ro orobai ri, neitiro nou ro pesomani aboto iwapotai-ma pua iopia-mari. Iedi puki dubu teibo ro nou ro pesomani aboudo mea se giwopirowa-ma, neitiro nou ro piro se aise gimeiriai-ma-ro ioudo gorowameai-rido. Ina

iedi meamea tanaro ro nou ro na-gisioidiro, nou Godi ro mea tuputupu orobo to nou ri gapoi.

<sup>26</sup> Ina idaibo sosoro ie urubia dubu abato urio komidiro tato, iedi durupi ro pamo ie. Ina atu sosoro ie, kimibiria nakara se modobo pua meamea tuputupu tanaro kisioidiro tato, iedi kimibiria ro pamo ie.

### 3

*Kimibiria urubia nio matagoro kidiobuti modobo ie*

<sup>1</sup> Mo niramio, nio sirio se modobo pua Godi owera kitamudiro urubia to kararasoro. Mabu nio umoro ie Godi owera kitamudiro urubia saiki ata Godi ro koko tanaro to ama-imeiouti-ri, ibo pua nou ro arua kimibiria urubia sosoro kimeiouti.

<sup>2</sup> Nimo imese urubia, gabo rido karagarewado ie. Ibose ata dubu ata owera karo maumo ato, nou ro ata ubauba owera karo tato, nedi dubu ro kororomai ie, meamea tanaro kisioidiro maumo ato nu momuo durupi mea mino to kowaboi ie.

<sup>3</sup> Ma-diauri-mo, urubia dubu ro hosi hodo to matagoro rido na-emebuai, hodo beda sapuwo rido kopodia ra edi hosi ro urubia dubu ubi moro to aise kou e.

<sup>4</sup> Mea se kemabuti aboto, sawa pe gebarigebari ma-dimaragoidiro-mo. Neio sirio tau auna gawia ro iworohutiti-dumo, kaupoti neio kiauri urubia ro kemohorea aibi kainakaina neito imohoreautiti-dumo, kiauri urubia ro beda duriomoro ubi imamo-dumo, na-imohoreauti-dumo iedi sawa pe gebarigebari ro neio ubi moro to aise kitowerai ie.

<sup>5</sup> Ina idaibo sosoro ie matagoro auna namabu pua urubia durupi ato na-iamo. Kaupoti matagoro rido awawo keremowabu owera tisuwodutiti-dumo.

Ina ma-dimaragoidiro-mo, auna tato era mio sugamuso ato na-weresimai, auna duriomoro kouho to emodobuti-ri pua imese kowaruruti ie.

<sup>6</sup> Ina ata mino to kemabuti ato, matagoro era pina sosoro ie, era iato aise iriwaretiti. Imese ubauba owera sirio matagoro rido na-isuwoduti-dumo era paruo rido ie, ina nimo durupi ubauba neito nirimowaititi-dumo. Nimo mamio ro beda tau ato na-nirotuti-rimo, womu tato pamo namadimi-iauri-ri, nedi matagoro era ro nimo keremiro momuo se aise iouratiti.

<sup>7</sup> Ina kiauri ato beda mutu erere nakomu ra duriomoro ato na-oroho-dumo, erere pawa, niro to kororomudidiro nakomu, erere nakere obo ato na-oroho-dumo, neio urubia ro ta-iageawadotiti-mo ina abora ti-iageawado-dumo.

<sup>8</sup> Kaupoti urubia dubu simara matagoro kageai modobo pua. Matagoro serawo se owamotiti, kageai tato tumu na sosoro ie. Nu ibose ie pamo bagawe sosoro ie.

<sup>9</sup> Amia tau Abera Naramu Godi nimo Abera nedi atu matagoro ro neito nemowabutiti-dumo. Ina amia tau urubia Godi ro na-gisioidiro nou ia sosoro to, neio nimo ro ubauba niwaititi-dumo.

<sup>10</sup> Nedi atu matagoro ro neido isuwodutiti-do Godi kemowabu ina ubauba owera iato kosuwoduti. Mo niramio, idaibo kimsaupiawado tanaro modobo ia pua kororosioidiro aboto!

<sup>11</sup> Karakara obo, topo obo mutu neitiro atu obo sosu rido kisuwoduti pua.

<sup>12</sup> Mo niramio, woimu ota rido siporo kisuwoduti pua. Ibose kapoka ota rido woimu iopu kisuwoduti pua. Ina atu sosoro ie, topo obo damena obo sosu rido kisuwoduti pua.

### *Godi muro, duriomoro muro*

<sup>13</sup> Nio abato ata dubu ata mea muro mutu komidiro ato, ibose mea kimaragoidiro mutu, nou ro modobo ie meamea tanaro durupi to kiwawuti, keremowabu tato, ina muro to kisioidiro ie.

<sup>14</sup> Kaupoti nio etio abato iamo ubauba kimaragoidiro arua urubia sapuwo to, ina neio auna ubi ie auna to korowomidiro, idaibo tanaro sapuwo to keremowabu modobo ia pua.

<sup>15</sup> Neio ro modobo pua Godi edi morobise ia owera ubauba kowaititi. Idaibo sosoro muro sopu duriomoro muro ie, Godi aboudo pua, bagea urio aboudo ie Satani nou se ie.

<sup>16</sup> Ubauba kimaragoidiro, ina ubi auna to korowomidiro, nedi ubauba tanaro teibo ro urubia ro bato kisioidiro ra, urubia owera kirowidiro tato, ina erere ubauba tanaro sirio ibose iato tiamo aise kororosoidiro ie.

<sup>17</sup> Beda muro ra Godi aboudo na-wou-dioumo, nou timase. Etio abato na-iamo Godi edi muro ro nedi urubia ro ata mareamarea tato ia ie, urubia miro kiwaititi, urubia kiwoiriamuti, sirio tau arua urubia owera kimewidiro ie. Nedi urubia ro neio ro durupi to nirimagare tanaro auna se isioidirotiti-dumo. Muro tanaro kisioidiro ato idaibo ie, meamea tanaro neio aboudo aise kisuwoduti ie, meamea ota iopu ota

rído beda sosoro kisuwoduti ra idaibo sosoro ie. Nedi urubia ro neio borubi mutu se idabuti-ri pua, sirio urubia atu modobo ato kiwarebidiro ie, ina neio kerematigi urubia pua.

<sup>18</sup> Ibose serawo tau ato urubia miro etio ro iwaititi-dumo, neio ro idaibo meamea ohona iopu ibouti-dumo. Ido meamea tuputupu tanaro neio keremiro rido amadimi-isuwoduti-ri.

## 4

### *Durupi momuo se diaiwai-mo Godi aboto*

<sup>1</sup> Keremaro, karado nedi tanaro teibo ro nio ro na-isioidirotiti-madumo neitiro boido ororomadetiti-dioudo? Nio ubauba ubi na-iamotiti boso ioudo iratamudirotiti-dumo, a? Iedi ubauba ubi ro na-iamotiti nio niro turi ato, boso neio ro iworohotiti-dumo.

<sup>2</sup> Nio ubi mutu e, kaupoti nio abato iamo pua, ina noudo ie nio ro arua urubia kiopiauti. Nio ibose auna ubi ie arua urubia nakomu kimade, kaupoti nio ro kimade modobo pua. Ina noudo ie nio keremaro karado. Etou mabu rido ra nio ro iauri tato? Mabu nio Godi aboto kararatoro pua.

<sup>3</sup> Nio Godi aboto namabu ri kararatoro ato, nio ubi ie nio simara na to kiasoro. Nio ro Godi ubauba kimaragoidiro mutu kararatoro ie, nou rie nio kararatoro owera kimade tato.

<sup>4</sup> Arua mamio ro uramio mau beda sosoro kisebo ra, nio idaibo sosoro urubia ie Godi sapuwo to! Nio umoro ra soku duriomoro tanaro mutu kidabuti ato, idaibo sosoro ie Godi nio ro ohoiotiti-dumo. Nio etio ra soku duriomoro tanaro mutu na-idabutiti-dumo, nio Godi ro nasa urubia to imese iasouti.

<sup>5</sup> Ina Tarena Buka ato edi owera ro owamotiti kowamo kawa a-owamotiti ra, ibo Tarena Urio Godi ro na-gapoi-ro nimo niro turi ato omidiro ri, nou auna ia ubi ro owamotiti ibo nimo ro Godi ubi tanaro se kisioidiro.

<sup>6</sup> Kaupoti Godi edi wisa tato nirimagare ro auna ia se owamotiti nimo abato. Ina Tarena Buka ato owera nou mabu ato gowapotai-ro ibo, *Godi ro keremowabu urubia gabo imoputi-die, kaupoti nou ro keremowabu tato urubia aboto wisa tato nirimagare auna ia se iaiwotiti-die.*

<sup>7</sup> Ina noudo ie nio durupi momuo se diaiwai-mo Godi aboto. Satani demotobowa-mo ina nou nio aboudo hio to ama-odau-ri.

<sup>8</sup> Godi aboto aise dosiomai-rimo, ina nou nio aboto amadi-osiomai-ri. Nio imese ubauba tanaro kisioidiro urubia ie, ina noudo ie nio etio ra ubauba aise na-isioidiro-dumo, tu marea aise diwiouti-mo, ubauba to ina orowame mamu. Nio etio ra kimaragoidiro teibo mutu na-orowomidiro Godi kowasoro aboto ina ibose sopu duriomoro ubi tanaro na-ibodoro-dumo, nio giropu marea tato diwai-mo.

<sup>9</sup> Nio pape urubia sosoro ba-dorowomidiro, idobi auna se ba-deremerete-mo. Nio etio ra kamade mutu duriomoro ubi tanaro na-isioidiro-dumo, idaibo korowomidiro keremiro aise dimeserai-mo. Gaga kirorouti idobi to diapoi-mo. Kamadekamade tanaro dimeserai-mo, nitonito se dorowomidiro.

<sup>10</sup> Nio modobo ie nakara se sopu to korowororuwoidiro Abera Naramu sosoro gabo ato, ina nio nou ro ohu to nato ama-iwioidiro-ri.

<sup>11</sup> Niramio, arua kimibiria borubi ubauba iwaititi mamu, iasoro mamu ibo, 'Neio ro

ubauba tanaro gisioidiro-rimo.' Ibose oro ro ata kimibiria neama odoromai mamu ubauba tanaro kosioidiro sapuwo to. Oro ro idaibo tanaro na-osioidiro, Godi edi sabi patu ro oro ro ubauba to iasoro, ibose Godi edi sabi patu ro neio koto kiauri dubu to oro ia ro ararapoi rie. Oro ro Godi edi sabi patu ro na-imeiouiti, oro ro ibose nakara se tisebo. Ina sabi patu koto kiauri dubu to oro ro ararapoi rie.

<sup>12</sup> Nedi duriomoro gebari ro nato, Godi nakara se nou se ie sabi nou ro giaiwai-ro ibose nu koto kiauri dubu kaupoti nou se ie. Nou abato se pupuwo towamo nimo iapopo ri, ibose nimo ubauba iwai ri. Ina oro ro kimibiria neama aboto ibo na-utura, 'Oro ro ubauba ta-wosioidiro,' oro etu ra.

### *Keremowabu sapuwo to umoro owera ie*

<sup>13</sup> Namabu keremahudirio urubia, abora owera neito ma-dirowidiro-rimo! Nio ibo etio ro iaro-dumo, 'Abora adimo o ata saiki iedi moro ro ito anamadimo-ou-ri, kaupoti kisimisi to anama-orowomidiro-ri iato, namabu mani to iato anamadimo-orowamade-ri mani anamadimi-idabuti-ri.'

<sup>14</sup> Mea se! Nio umoro pua ata kowaroho ato beda tanaro ra nio aboto namadimo-ororosioidiro-ri. Nio edi keremiro ro kowaroho gebobo sosoro ie, papamo egea mere se kiamo ie, saiki kimewia ato aise koroporeai ie.

<sup>15</sup> Nio ibo karo modobo ie, 'Abera Naramu ubi ato, nimo anama-irowomidiro-ri, ina nedi tanaro ro nimo ro nou namadimi-isioidiro-ri.'

<sup>16</sup> Kaupoti idaibo kimaragoidiro nio ro abora nou iworohuti pua, nio keremiro sapuwo to

eremowabu-dumo, ina keremowabu imese ubauba ia tanaro ie.

<sup>17</sup> Ina noudo ie nio etio ra umoro na-iamo meamea tanaro kisioidiro sapuwo to, kaupoti kisioidiro tato, nio ro Godi sabi isebo-dumo.

## 5

*Umoro oweru ibo ie namabu sirio urubia aboto*

<sup>1</sup> Ina namabu sirio urubia, nio ata oweru neito ma-dirowidiro-rimo! Idobi auna se deremerete-mo, mabu nio aboto auna ubauba tau tou-die, nio ro amadimo-owea-ri.

<sup>2</sup> Nio edi namabu sirio ro neio ipusiti-dumo. Ibose nio edi meamea kiroidiro namabu sirio ro kipiri ro itotoutiti-dumo.

<sup>3</sup> Nio edi sosopeni sirio ro barugu sirio arua namabu mutu, neio esepaesepa ro irobowado. Godi edi koto saiki ro nato, iedi esepa ro na-iamo nio neio ro paease amadimi-iwapotaidiro-ri ibo nio ubauba tanaro urubia ie. Ina nio edi namabu esepa ro era beda sosoro ra nio durupi neio ro amadimi-ihotiti-ri. Nio umoro a-iamo ra ibo nedi sopo duriomoro ro womu tau emou-die, ina nio meamea namabu inaina aise eremowoiriamuti-dumo?

<sup>4</sup> Ma-dowea-mo! Nio pari namabu edi woko urubia ro imadabutiti-dumo, neio edi woko mani ro nio ro imowopiro-dumo. Mani abora Godi aboto tiaiauti-dioumo. Mabu neio edi woko mani ro nio ro imowopiro-dumo. Nedi woko urubia ro, abora imese pupuwo ia Abera Naramu Godi nou ro iamo timewidirotiti-die.

<sup>5</sup> Nio keremiro mea se giwaboi-rimo nedi duriomoro ro nato ubi nakomu nio abato



modobomodobo ato giamo nio ro mea tau giauri-rimo. Nio mea se ta-giamidimai simara durupi ubi tanaro na-gisioidiro-rimo. Nio nakara se kiwoubua nakomu sosoro ie awawo ta-gorowai-rimo, Godi ro tiwaguwo-die kiopiauti aboto.

<sup>6</sup> Nio mea tuputupu urubia ro imotoburio pua, nio ro mabu tato moro ato bagea koto aboto aise iworohotiti-mo iato kiopiauti ie.

*Deremasebidiro-mo, koko se dorowotoi kimibiria mutu*

<sup>7</sup> Ina noudo ie niramio, deremasebidiro-mo, serawo samo to oi mamu, koko se dorowotoi, womu tato Abera Naramu namadi-orowameai-ri. Ina pari kisioidiro urubia nio ro ma-diauri-mo, neio beda mino to iremasebidirotiti-dumo pari ohona mea se kisuwoduti aboto. Ina ibose surama daroho na-emasebidirotiti-dumo pari nou ro mea mino to kimaudurai aboto, neio masawe samo to oi ri pua. Ina gawia saiki nato na-otobowa, iopu mea mino to kisuwoduti ie.

<sup>8</sup> Kimibiria urubia nio ibose masawe samo to oititi mamu, koko se ba-dorowotoi, mabu Abera Naramu korowameai tau aupise ie.

<sup>9</sup> Niramio, kimibiria naminiramio sapuwo to mouro oweru aro mamu, nio etio ra idaibo tanaro namadimi-isioidiro-ri, mea se, nio Godi ro koto aboto ama-iwou-ri. Koto kiauri dubu aupise ie amadi-orowameai-ri.

<sup>10</sup> Niramio, Godi ipusu oweru urubia neio ba-dimaragoidiro-mo. Neio ro Abera Naramu ipusu oweru na-gimowauti-rimo, temeteme urubia aboudo ta-giauri-rimo, kaupoti neio

masawe hio to oititi pua, koko se ta-gorowotoi.  
Neio ba-dimatiouti-mo.

<sup>11</sup> Nio umoro ie nedi urubia ro koko se  
na-gorowotoi neio nimo ro  
ti-nimaragoidiro-dumo neio ro meana Godi  
aboudo ta-giwia-rimo.

Nio ro keba se umoro ta-goi-rimo Iobu totomu,  
nou sirio mibo na-iaurititi koko se beda sosoro  
gotoi. Nou edi mibo tanaro sirio ro  
na-goroporeai-rimo, Abera Naramu ro meamea  
tanaro nou aboto nato gisioidiro. Mabu Abera  
Naramu imese auna nirimagare dubu e urubia  
aboto.

<sup>12</sup> Mo niramio, nedi owera ro na-naro, auna ia  
owera nou e. Simara hodo kasaubiai owera  
koko kiwaititi sapuwo to, modobo ia pua Adiri  
sabowa masiro kapoi, o sopu goto masiro kapoi,  
ibose ata masiro kapoi, sabi ie. Nio 'Io' owera  
na-emaragoidiro-dumo, 'Io' se dutura-mo. 'E e'  
owera na-emaragoidiro-dumo, 'E e' se  
dutura-mo. Nio ro morobise to gidimu-utura-ri  
nato aise gidimi-isioidiro-ri. Nio idaibo tanaro  
kisioidiro tato, nio ro ubauba wisa  
amadimi-imade-ri.

*Kararatoro owera kimibiria mutu gi-araratoro-ri*

<sup>13</sup> Nio abato a-womidiro ra ata dubu ata mibo  
maumo ato? Nu modobo ie Godi aboto  
kararatoro. Ina nio abato a-womidiro ra ata  
dubu ata kamade mutu? Nedi dubu ro modobo  
ie Godi kamade ohare to kemaboduti.

<sup>14</sup> Ina ibose nio abato ata dubu ata a-womidiro  
ra temeteme mutu? Nedi dubu ro modobo ie  
Iesu urubia kiwabo urubia neio kirumai. Taie  
neibi ata ro temeteme sapuwo to nato

kararatoro ie, Abera Naramu edi pupuwo ro neito mea isi eputa to na-emasia,

<sup>15</sup> taie morobise kimibiria mutu kararatoro ato, temeteme dubu meana aise koi ie, nou Abera Naramu ro aise kowotobowa ie imese koroho ie. Ina temeteme dubu ro beda ubauba gisioihiro keba se Godi ro kimatopeamuti ie.

<sup>16</sup> Ina noudo ie keba se nio simara ubauba kimibiria naminiramio aboto kiwapotaidiro modobo ie, ibose Godi ba-dararatoro-mo neio sapuwo to, nio meana kiwai aboto.

Ina ma-dowea-mo, mea tuputupu dubu nu edi kararatoro owera ro imese pupuwo ia ie, nou ro beda sapuwo to kararatoro ra, tanaro morobise to aise kororosioidiro ie.

<sup>17</sup> Eraia urubia dubu e nimo beda sosoro ra, kaupoti nou abato idaibo tanaro ta-gororosioidiro. Nou edi kararatoro owera ro pupuwo mutu garo Godi aboto, daroho kou tato sapuwo to. Ina nou rie Isiraere duriomoro ato daroho iarotiti pua, 3 kisimisi 6 sogomi daroho tato irowomidiroiti.

<sup>18</sup> Eraia ina Godi aboto iato gararatoro daroho emeiriai ri, taie Godi ro daroho aise gemeiriai-ro, imese pari namabu daroho ro na-gimaudurai, imese meana ia se gisuwoduti-rimo.

### *Etu ro kararaseperai ra dowameai-ro Godi aboto*

<sup>19</sup> Mo niramio, etu umoro ra nio abato ata dubu ata na-wararaseperai Godi edi morobise gabo ro nou aboudo, nio ata ro nou kowameai modobo ie.

<sup>20</sup> Nedi kowarebai dubu ro umoro ba-moi ibo, nedi gabo kiaseperai dubu ro nou Godi edi gabo

ro neito etu ro kowameai ra, nu nou ro pamo  
aboudo kapopo ie. Ibose nedi dubu ro beda  
ubauba tanaro sirio na-isioirotiti, Godi ro  
imese aise kimatopeamuti ie.

**Tareka Buka**  
**Portions of the Holy Bible in the Bamu language of**  
**Western Province, Papua New Guinea**  
**Buk Baibel long tokples Bamu long Niugini**

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

---

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4